

lewers daar doer
in die heel boonste hoekie van ons land
het die studente van Unioord
elkeen 'n kindjie gevat aan die hand

Van deurnag in die warm swembad swem
tot weners wen
is Tshipise die plek waar ons deur al die mannewales
ons Vader se hart 'n bietjie beter kon leer ken

Daar is min dinge so lekker soos potjiekos
of 'n bid-buddy in die middel van die bos
en 'n vreemde tannie se melkkos
laat ons vir 'n wyle ons alledaagse probleme los

En of dit nou die poppe of die bokke is wat hier kom
deur alles, moes ons onthou
dat elke ding wat ons doen
eer bring aan Hom

Het jy al ooit op braaipap gesokkie
of 'n stewige gesprek aangeknoop
met ons busbestuurder, oom Tokkie
oor 'n koppie koffie?
Vroeg opgestaan om poppekas te hou
en lank na slaaptid wakker gebly om chats te bou?

Opnuut het dit ons herhinner
deur die wysheid van 'n swaeltjie
of die geloof van 'n kind
om ons harte aan ons Here
styf vas te bind

Want so stuur Ek julle
om berge te verskuif
dalk 'n traantjie te pik om 'n kampvuur
of kraletjies te ryg

Volleyball te speel
vir 'n uur te luister na 'n oom se lewensstorie
en ons harte met mekaar te deel

Maar die bobbejane klim saam berg
en tot die bosapie se stert weet
Tshipise 2026 was 'n uitreik
wat ons nie sommer
sal vergeet

Monique Roolvink

TSHIPISE-UITREIK



Handevat FIETSTOER-UITREIK

Wat 'n ervaring en 'n voorreg. Hierdie jaar se fietstoer was weer eens 'n reuse sukses, met groot glimlagte, seer-getrapte-bene en pragtige natuurskoon soos ons van kerk na kerk tot in Botswana getoer het.

Met die uitreike het ons baie liefde uitgedeel en ervaar saam oud, jonk en mense met duisende verskillende stories wat jou laat skaterlag en soms 'n traan laat rol.

Saam met 22 lawwe studente, spokies, hoenders, windpompe, damduikers en laat nagte om die vuur wil jy nie volgende jaar uitmis nie.

Karel Albrecht



Liewe leser

Hoe kan ek die ongelooflike ervarings van Boons tot Botswana in 'n paar woorde saamvat? Dag 1 se verskriklike bulte het met sy eie beproewings en gebede gekom. Dit was wel die trap werd toe ons met lekker melktert en goeie geselskap verwelkom word.

My beker loop oor van dankbaarheid na die week. Soveel mense het hulle huise en harte vir ons oopgemaak. Van stories en lewenswysshede wat gedeel word tot lag dat die trane loop, saam sing en opreg en eerlik nog steeds voor mekaar te kan staan aan die einde van die dag.

Die skrif van week was Galasiërs 5:13-26, waar ons dieper in die vrugte van die Gees gedelf het. God het elke dag opnuut vir my openbaar wie in Sy weë lewe, sal Sy vrugte dra.

Ek het gegaan met die doel om te gee, maar het soveel meer ontvang. Met seer bene en min slaap het ek ongelooflike mooi vriende gemaak wat ook my passie vir die Here deel.

Ek los julle met die volgende: Psalm 16:11 "U sal my die pad van die lewe bekend maak; versadiging van vreugde is voor U aangesig, lieflikhede in U regterhand, vir ewig."

Seën en liefde
Anja



Dit is bitter min dat 'n mens die voorreg het om deel te wees van 'n uitreik soos die Handevat Fietstoer. Dit is nog skaarser dat die groep mense wat saamgaan, MEKAAR ook met soveel liefde en deernis hanteer.

Ek het gedink ek gaan op hierdie uitreik om ANDER te help. En ja, dit het ek beslis reggekry. Maar boonop, het ek iets ongelooflik van die Here se genade en liefde ervaar. Daar was vreemdelinge wat ons soos hulle eie kinders hanteer het en mense wat nie geskroom het om vir ons borge te gee nie. Dit is asof ons die liefde wat ons gekom het om met ander te deel, meermale terug ontvang het.

Die Bybeltema van hierdie fietstoer was die Vrugte van die Gees. Ons het elke aand deur die teks van Galasiërs 5:13-26 gewerk. Elke aand het daar steeds nuwe dele uit die teks uitgestaan, wat gepas het by die gebeurtenisse van die dag.

Ons het hierdie vrugte of eienskappe op wonderbaarlike maniere beleef.

Die vreugde by die uitreike met die kinders was aansteeklik gewees. Om die kampvuur kon mense die vrede in almal se harte en oë raaksien. Selfs deur die harde bulte se uittrap, het ons mekaar aanhou aanmoedig.

Opmerklik het elkeen op die toer die Here se teenwoordigheid op hulle eie manier ervaar.

Die toer het my oë oopgemaak vir al die seer in ons land, maar ook al die goeie werk wat reeds aan die gang is. Dit het my hoop gegee en ek sal dit enige tyd weer doen.

Bo alles, was God se Getrouheid die gedagte wat deur die hele toer gestraal het. Die Here was sonder twyfel daar in elke oomblik. Hy het ons beskerm tydens uitdagings soos fietswaprobleme en modder-vassit. Elkeen se ervaring en stories van die toer is 'n nuwe getuigenis dat ons 'n ongelooflike Here dien wat dag na dag aan ons onstuitbare genade bewys.

Evelynne